

Dithero tsa Tirelano mo Kutlwanong

49/2013 Thero ka Sontaga wa 19 morago ga moletlo wa borarobongwe, e le ka 06. 10. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 13 - 13/14

2. Thapelo: AMORENA, utlwa thapelo ya me a go lelela thuso ga me go fitlhe kwa go wena! Semphitlhele sefatlhego sa gago mo motlheng o ke leng mo pitlaganong ka ona; ntshekegele tsebe motlhang ke bitsang, o nkutlwe ka bonako, Pes. 102:2-3. Amen

3. Epistolo ka fa thulaganyong ya 2 e kwadilwe mo go Baefeso 4:22-32;

Efangele ka fa thulaganyong ya 1 e kwadilwe mo go Mareko 2:1-12.

4. A go ipolelwe tumelo ya bokeresete!

5. Sefela sa 255 - 237/247

6. Thapelo ya mmadi wa thero.

7. Efangele ka fa thulaganyong ya 5 e kwadilwe mo go Johane 5:1-16, e re: "Morago ga tseo ga nna moletlo mongwe wa Bajuta, mme Jesu a ya Jerusalema. Jaanong go na le bodiba mo Jerusalema fa Kgorong ya Dinku jo bo bidiwang Bethesta ka Sehebere, bo na le maobo a le matlhano. Mo go ona go ne go letse balwetse ba bantsi le difofu le batlhotsi le baomeledi, ba ntse ba letetse kgobero ya metsi. Gonne moengele o ne a tle a fologele mo bodibeng ka dinako tse dingwe, a hudue metsi, yo jaanong a tsenang pele, metsi a sena go huduiwa, a fole, le fa e ka nna bolwetse bofe jo bo mo tshwereng. Jaanong go ne go le motho mongwe teng yo e setseng e le dinyaga di le 38 a ntse a lwala. E rile Jesu a mmona a letse, mme a utlwa gore ga a bolo go nna jalo, a mo raya a re: 'A o rata go fola?' Molwetse a mo araba a re: 'Morena, ga ke na motho ope yo o ka ntsenyang mo bodibeng, fa metsi a huduiwa; e a re ke sa ntse ke tla, go fologele yo mongwe pele ga me.' Jesu a mo raya a re: 'Tsoga, o tsee bolao jwa gago, o tsamae!' Ke fa motho yoo a fola e sa le ka nako eo, a tsaya bolao jwa gagwe, a tsamaya. Mme letsatsi leo e le la Sabata. Ya baa gona Bajuta ba rayang yo o fodisitsweng ba re: 'Ke Sabata; ga go a letlelelwa gore o rwale bolao.' Yoo a ba fetola a re: 'Yo o mphodisitseng

ke ene yo o ntheileng a re: 'Tsaya bolao jwa gago, o tsamae.'" Ba mmotsa ba re: 'Motho yoo ke mang yo o go reileng a re: 'Bo tsee, o tsamae?'' Mme yo o fodisitsweng o ne a sa mo itse; gonne Jesu o ne a ngwangwaetse, go le batho ba bantsi mo felong foo. Morago ga moo Jesu a mmona mo Tempeleng, a mo raya a re: 'Bona, o fodile; o se tlhole o leofa, gore se se bosula bogolo se se go dirafalele.' Motho yoo a ya a bolelela Bajuta gore ke Jesu yo o mo fodisitseng. Ka ntlha ya moo Bajuta ba tlhomara Jesu, ba batla go mmolaya, ka a dirile dilo tseo ka Sabata." Amen.

8. Thero: Phuthego e e rategang mo Moreneng wa rona Jesu Keresete, mo Lefokong le go buiwa ka ga moletlo wa Bajuta o o neng o le teng kwa Jersalema. Jesu o ne a tlhatlogela teng. Ga re bolelelwe gore e ne e le moletlo ofe. Se re se utlwang ke fa morago ga tiragalo nngwe, go ne go na le moletlo wa Bajuta. Meletlo e e neng ya dirwa ka nako ele ke wa Tlolaganyo, wa Phentekoste, le wa Metlagano. Jesu o ne a ya kwa Jerusalema ka moletlo oo. Fa go buiwa ka ga Bethesta, go rewang? Go rewa ntlo ya bopelonomi. E ne e na le maobo a le matlhano. Ga robadiwa balwetsi mo go ona, ba na le makoa a a farologanyeng. Ba solofela gore ba tla fola, fa metsi a ka nna le kgobero. Tota ga fola wa ntlha yo o tsenyeng mo metsing, e rile moengele a sena go fologa go hudua metsi.

Phuthego, le kajeno go na le malwetse a le mantsi, re ka tshwaya Tb. HIV/Aids, le a mangwe a a ka umakiwang ke wena. Teng koo go ne go na le mongwe yo e setseng e le dinyaga di le 38 a ntse a lwala. Ke sebaka tota. Ke re: O ne a setse a latlhile tsholofelo, gonne o ne a se na mothusi go mo tsenya mo metsing. Ke fa Jesu a goroga, a mo fodisa, a sa mo tsenya mo metsing. Gopola potso ya Morena, a re: AA o rata go fola? Molwetse a re: AEe! Ke fa Morena a mo raya a re: ATsaya bolao jwa gago, o tsamae. Ke kgakgamatso e kgolo. A ga o rate go alafiwa, le go fodisiwa ke Morena Jesu? Ka gongwe le wena o setse o lwetse sebaka ka bolwetse jo o mo mmeleng wa gago, le mo moweng wa gago, o sa bone go tsoga. Tla, o ye go Jesu, a a go fodise mo bokoeng jwa gago. Go ka diragala gore o lwaditswe ka go hutsafadiwa ke matlhoko a a rileng, o sa itse gore o ka gololwa ke mang mo morwalong oo o o mo magetleng a gago. Jesu o a go laletsa, a re: ATlaang kwano go nna lotlhe ba lo lapileng, ba lo imelwang; nna ke tla lo lapolosa! Math. 11:28. O tle mmogo le morwalo wa gago, o ye mo go ene yo o ratang go go thusa. Jesu a rwala maleo otlhe a lefatshe lotlhe. Go na le batho ba ba sa tiholeng ba na le thata, ka ba imafaditswe ke maleo, ba sa rate go

kgaogana le ona. Sekao sengwe ke se: Monna mongwe o ne a bowa mo Ditaemaneng, a belega ditshipi mo kgetsing, a wela mo kगतamping, mo lefuting kwa go tshwerweng teng ba ba tsomang matlo, a kua. Modisa a utlwa, a mmona, a mo folosetsa kgole, a e tshwara, modisa a goga, mme kgole ya kgaoga. A mmolelela go re a tlogele morwalo go fokotsa bokete, ga diragala gararo, Monna a gana. Mo bofelong modisa a mo tlogela teng koo, a gopola letsomane la gagwe. Le wena, fa o ka gana, o tla swela teng koo mo lefuting, fa o rata ditshipi tsa gago bogolo go botshelo jwa gago. Bona Jesu, o lebe sefapaano, o kope bopelotlhomogi le boitshwarelo mo go ene. Mme mo go ba ba latlhegang sefapaanong ke bosilo, mme mo go rona ba re pholosiwang ke thata ya Modimo.

Jesu o bona molwetsi, mme molwetsi ga a mo itse. Kwa Jesu a lebileng balwetsi botlhe le batlaledwi, matlho a gagwe a ne a bona yo o neng a lwala sebaka. Ga re itse, ka gongwe Jesu o ne a mmona, a ntse a tsamaela meletlo kwa Jerusalema, fela se re se itseng, ke fa Jesu a ne a itse ka tsela ya gagwe go bona se se sa bonweng ke motho. Ka moo Jesu o ne a atamela mo go ena, a mmotsa, a re: AA o rata go fola? Molwetsi a mo araba a re: AMorena, ga ke na motho ope yo o ka ntsenyang mo bodibeng, fa metsi a huduiwa; e a re ke sa ntse ke tla, go fologele yo mongwe pele ga me. Ka gongwe le wena o na le mathata ao. Itse gore Jesu o teng, o a batla, o rata go go thusa mo mathateng a gago. O se ka wa ngaparela mo go ona, o a latlhele mo go Jesu. Kgogo e tsala maje, e a elama, e a thuba, e tlhokomela dikokwana. Batho ba ja nama ya koko, fa dikokwana di godile. Ba a tshela. Mme boleo jo o elamang mo go jona, bo tla thubela loso. Ke tšhefi. Ga e jewa. Yo o e jang o tla swa. Ga a tshele. Yo o elamang mo boleong, bo tla mo tlišetsa loso. Ke noga e e tsalang bana ba ba tla lomang ene ka nosi. Thanya, wena yo o robetseng mo majeng ao! Ka gongwe le wena o re: Morena ga ke na motho yo o ka nthusang. Nyaya, ba teng. Baruti ba ka go thusa mo mathateng a gago. Le Jesu o teng. Baruti ba tla go thusa mo leineng la ga Jesu. Tsotlhe tse ba ga Jesu ba di dirang, ba a di dira, gonne ba romilwe ke ene. Ba dira mo leineng la gagwe. O solofele botshelo joo. Jesu o teng. Ikanye gore le wena, Jesu o tla go naya botshelo.

Bomorwa-Rre, bokgaitsadie mo Moreneng, Jesu a re: ATsoga, o tsee bolao jwa gago, o tsamae! Kwa a buileng teng le motho yo o neng a se na thata go tloga mo bolaong jwa gagwe go itatlhela mo bodibeng, o ne a mmolelela go dira seo, a tloge, mme motho yole o ne a se na thata go tloga, a tsee bolao. Fa a tloga, o ka tsaya thata kae go bo

tsaya, a tsamaye a rwele bolao. Ga twe: AKe fa motho yoo a fola e sa le ka nako eo, a tsaya bolao jwa gagwe, a tsamaya. Se se diragalang mo bathong, go diragala mo Modimong. Go ntse jalo mo bathong ba ba fodisiwang mo malwetsing a bone, le fa ba sa itse gore ba fodisitswe ke mang. Ee. Go ntse fela jalo mo go ene yo o neng a lwala sebaka sa dinyaga tse di 38. Ditsala, mokwadi wa lokwalo longwe a re: Go ne go na le motho yo o kileng a bolaya yo mongwe, a mo fitlha mo moseleng, a tsamaya, a re: A ntse dinyaga tse dintsi a fitlhile yole, go itse ene fela. Ka go tsamaya ga dinyaga seo sa mo tshwenya mo pelong. A gopola moruti, a ya mo go ene. Moruti a mo raya, a re: A a ye mo go ba molao, a supe kwa a fitlhileng setopo teng. Moruti a mo felegetsa go ya mo maphodiseng. Akanya gore go diragalang. Molato ga o bole, bole o ga bo fele, fa go sa baakanngwe kgang ya jona. Le wena baakanya kgang ya bole o ya gago fa pele ga Modimo. Tlhabologa, o ipolele molato, o amogele boitshwarelo mo leineng la ga Jesu!

Ga twe: AMme letsatsi leo e le la Sabata. Bajuta ba ngongoregela tiro eo ya go rwala bolao ka Sabata. A re gopoleng gore Jesu ke Morena wa Sabata, le gore letsatsi la Sabata le diretswe motho. Motho ga a ka a direlwa Sabata. Ka moo Jesu, Morwa-Motho ke Morena wa Sabata. Re rutiwa ka tiragalo eo go dira molemo ka Sabata, mme e seng bosula. Jesu o dira ka malatsi otlhe. Gape o a pholosa, le go tshedisa ka malatsi otlhe. Mo Bajuteng tiro eo e ne e le molato, le tlolo wa molao wa Modimo. Jesu o dirisa thata ya gagwe ka fa ponong ya gagwe. A dira se a se ratang ka nako ya gagwe. Ga go na yo o ka mo kaelang. Ga go na yo o ka mo kgalemelang, Baroma 11:34-35. Bajuta ba ne ba re: Ba femela molao wa Modimo, mme ba ne ba lwa le Morwa Modimo.

Phuthego e e rategang mo Moreneng, morago Jesu a bona mofodisiwa mo tempeleng. Ga re utlwe gore motho yoo mo dinyageng tsotlhe tsa go lwala ga gagwe o kile a baya lonao mo tempeleng. Ke gopola gore ga a ka a dira, mme ya re a sena go fodisiwa, a ya teng go leboga Modimo ka ntlha ya phodiso ya gagwe. A rona re dirile go lebogela phodiso mo mmeleng le pholoso mo moweng? Kajeno Jesu o bua le nna le wena: ABona, o fodile; o se tlole o leofa gore se se bosula bogolo, se se go diragalele. Jesu o go kgaogantse le bole o, bolwetse jwa gago. Go ka nna, fa o ne o lwala ka ntlha ya bole o jo o bo dirileng. Go ka diragala le mo go rona ka gore re sena go fodisiwa, re boele mo boleong. A re se ka ra senya botshelo jwa rona mo maleong, re re: Re tla itumediswa ka bole o. Bo tla re utlwisisa botlhoko mo moweng le mo mmeleng. Jesu a re:

A se se bosula, se se bogolo go se, se se go diragalele! A re gopoleng gore go na le bosula jo bogolo jo bo tla re diragalelang, fa re ntse fela mo maleong.

Motho yole o ne a tsamaya, a bolela gore e ne e le Jesu yo o mo fodisitseng. Ke kgakgamatso, fa motho a na le thata mo go kalo. Bajuta ba mo kgalemela. Ba kgalemela jang? Ba ne ba sa tlhokomele kgang ya phodiso ya motlaledwi yole. Ba simolola go tsoma Jesu, ka a dirile phodiso ka Sabata, ba mmaya molato. Le rona re kgalemela Modimo, re o baya molato. Kana ona o rata gore lorato lo bonale mo go rona gore ke Mopholosi tota mo go rona. Tse o di dirang mo go rona ke motheo wa tumelo ya rona, gonne o re senolela Mopholosi wa rona gore ke yo o ntseng jang, gape Mopholosi wa rona ke mang? Amen.

9. Thapelo: Morena Jesu Keresete, o re pholose ka bopelotlhomogi jo bogolo jwa gago jo bo leng teng jaanong le ka bosakhutleng. Amen. Thapelo ya Morena: Rara wa rona yo o mo legodimong ...

10. Sefela sa 166 - 148/151

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. Mkhabela, ,ka ngwaga wa 2007

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.